

Vun Boom zu Boom

Mundartkolumne von Hans-Peter Schwöbel

Mir hawwe uns nadierlich nadd in Eischhärnsche verwondelt un sin vun Boom zu Boom ghuspt, gflooche, gschwebt. Wonn isch un onnare Frieheramol-Schlonke des versucht hädde, wäre ma krass uffgschlaache un hädde mords Drischder in de weesche Waldbodde ghaue. Nää, mir sin uffm Bodde gebliwene un vun Boom zu Boom gedibbt, gschläbblt, geloffe. Mir, des war der symbadische junge Agrar-Ingenieur un Nadurpädagog Mirko Klein, 25 Teilnähma un isch



uffm Waldlehrgang. Treffpunkt: Wassawerk Käffadal. De Mirko Klein hodd uns de Wald erklärt un isch habb aus moinare Nadurpoesie vokedraache. Schää, womma Gedichte im Wald vorliest un weeiß, nadd bloß die Mensche, aa die Bääm heere uffmerksam zu. Nadierlich wisse die Bääm, Blumme un Sträuscher, dass die Poesie vun ihne selwa kummt. Isch bin bloß ihrn Sekredär fär die Mensche.

Widda mol hodd sisch ä Erkenntnis aus de Sozialpsychologie bschdädischt: „Das Wissen ist der Wahrnehmung vorgelagert.“ Onnasch gsacht: Mir sehe bloß, was ma schun wisse. Beispiel: Je wänischa Bääm im Wald Anna unnascheide kann, umso wänischa sieht er. Zwar is do Ebbes, awwa ma kann's nadd uffnähme un s'bleibt nadd hafte. Alles is uuscharf. Womma donn lernt, Bääm un Sträuscha on ihre Blädda, Bliedde, Früscht un on de Rind zu unnascheide, is des, wie halwa blind gewese un endlisch ä Brill uffsetzt. Un nadd bloß geguggt un zugheert hamma, mir hawwe aa die Bääm oogelongt

un umarmt – mit verbunnene Aache. Wonn Se än Boom umarme, schbiere se, dassa ihrn Bruda is, un dass se sisch schun long känne, aa wonn se nix vunonna gewisst hawwe. Un mir hawwe die härrlich Waldluft noigezooche, wie lewendisches Wassa. Bis mir Mensche so gud riesche wie die Bääm, muss sisch die Evolution noch arg ooschdrenge.

On ääm Boom hodd uns un-san Nadurlehrer klääne Uffblatzunge gezeigt, wo wie ä Perlekett um de Boom rumlaafe. Ohne ihn hädde ma's nadd gsehe, un womma's gsehe hädde, hädde ma's nadd vaschdonne. Die Perlekett stommt vum Spescht, wo sisch on die Rinde krallt un se uffpickt. Raus laaft viel sießer Saft,

wo de Spescht donn mit Begeischerung trinkt. Er is halt än eschda Kurpälza. Was'm ääne soin Riesling, is äm Onnare soim Saft aus'm

Boom. Daher der Name Schluckspecht! Zum Schluss hodd de Mirko Klein noch spezielle Wahrnehmungsiewunge mit uns gemacht. Z. B. hodd jeda Teilnähma än Hondshbiggl griggt. Perspektivwechsel: Noch vorne gugge, awwa hinne sehe – nadd uff de Audobohn, sondan im Wald. Noch drei Schdunn schääne Bääm, Sträuscher un Blumme sehe, isses eigene Gsischt ernüchternd. Awwa, do muss ma dursch. So än Waldlehrgang is jo aa ä Art survival-training. Wisse Se, was isch mään?

»So än Waldlehrgang is jo aa ä Art survival-training.«

Hans-Peter Schwöbel

die kolumne gesprochen:

Schwöbel's Woche hören unter www.mannheim.de/schwoebels-woche